



# STINAPA TA INFORMA

## HISTORIA DI E PARKE SUPMARINO – PARTI 3

Na 1999 e parke supmarino a risibí di gobièrnu sentral e statùs di Parke Nashonal. For di e momentu ei e ta karga e nòmber: Bonaire National Marine Park. Un área di naturalesa por haña e statùs speshal aki si e ta protehá pa lei, sufisiente grandi pa ofresé lugá na diferente sistema ekológiko i si e ta ser manehá aktivamente. Den e mesun aña gobièrnu a kumpra Klein Bonaire bèk for di e komersiante ku tabata su doño pa basta aña. Na 2001 a inkorporá Klein Bonaire den e parke supmarino. Komo konsekuensha di e ekspanshon aki STINAPA a kuminsá haña un supsidio chikitu di gobièrnu. Afortunadamente esei tabata nesesario pa un periodo kòrtiku so. Na 2003 STINAPA Bonaire a haña un direktor general den persona di Elsmarie Beukenboom. Esaki tabata un paso importante den e proseso pa hasi e organisashon mas profeshonal. Un di su tareanan mas importante tabata pa hasi STINAPA finansieramente independiente. A logra esei ora ku gobièrnu a subi e entrada pa e sambuyadónan di \$10.00 pa \$ 25.00. Esaki ta algu ku ta for di 1992 a ser rekomendá den e rapòrt di Komishon Pourier. No solamente sambuyadónan pero tambe otro usuario di e parke supmarino mester paga entrada pa e parke. E poblashon lokal, ku eksepsion di sambuyadó, no mester paga. Landadó, hende ku ta snòrkel, sùrf òf kore boto di bela mester paga un "Nature Fee" di \$ 10.00 pa aña. Pagando esei nan tin mag di drenta Washington Slagbaai Park. Atrobe a resultá ku e usarionan di e parkenan no tin problema pa paga, basta ku ta usa e plaka pa maneho di e parkenan. Un otro suseso importante den 2005 tabata ku un parti di e personal di ámbos parke di naturalesa a haña e título di polis extraordinario. Despues di esei no tabatin mester di yama polis ora ku a haña hende ta kibrando lei òf regla di parkenan. Diferente hende a haña but di STINAPA kaba òf a resultá dilanti di hues. I ku rason, pasobra naturalesa ta di nos tur i e meresé protekshon. Pa e motibu ei na 2006 a entregá un proyekto di lei na Konseho Insular ku por protehá naturalesa tantu riba tera komo den laman. Esaki ta e Ordenansa Maneho di Naturalesa. STINAPA, ámtenanan di teritorio insular i speshalista for di Hulanda a traha hopi aña riba e proyekto aki. Ta di spera ku pronto e proyekto por pasa pa bira lei. Esaki lo nifiká un otro paso importante den e desaroyo duradero di Boneiru. Asina futuro generashonnan tambe por probechá di e produkto ekonómiko mas importante di nos isla: nos naturalesa. Pa mas informashon wak : <http://www.bmp.org/history.html>

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALES



**Traha huntu na un desaroyo duradero pa Boneiru**